



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnium Generalium Et Provincialium Collectio Regia

Ab anno DLXXVII. ad annum DXC.

Parisiis, 1644

Epistola CXVI. Gregorii Papae I. Ad Virgilium Episcopum Arelatensem.
Confirmat priuilegia per Vigilium papam concessa monasterio Arelatensi.

urn:nbn:de:hbz:466:1-15221

tentis Domini demonstretis, quod fideles illius ab inimicis eius absoluitis.

EPISTOLA CXVI.

GREGORII PAPÆ I.

AD VIRGILIVM EPISCOPVM ARELATENSEM.

Confirmat priuilegia per Vigilium papam concessa monasterio Arelatenfi.

Gregorius Virgilio episcopo Arelatenfi.

Grat. 25.
qu. 2. cap.
Cum piæ.

CVM piæ desiderium voluntatis, & laudandæ deuotionis intentio sacerdotilibus sit semper studiis adiuuanda; cura est sollicitudinis adhibenda, vt ea quæ pro quiete monachorum religiosæque conuersationis fuerint ordinata, nec dissimulatio negligere, nec quædam valeat præsumptio perturbare. Sed sicut hoc, quod ratio exigebat vtilitatis, oportuit definiri, ita quod definitum est, nisi forte vbi maior est auctoritas, non debet violari. Igitur gloriose memoriæ Childebertus Francorum rex, catholicæ religionis amore succensus, intra muros Arelatenfis ciuitatis monasterium virorum, vt scripto reperimus, pro sua mercede constituens, quædam ibidem pro habitantium sustentatione concessit. Cuius ne voluntas vnquam duceretur in irritum, & ea quæ pro quiete monachorum disposita fuerant turbarentur, quæque contulit in iure eiusdem monasterii, epistolis suis apostolica petiit auctoritate firmari; hoc quoque suæ petitioni subiungens, vt eidem monasterio, tam in dispositione rerum, quam in ordinatione abbatis, quædam pariter priuilegia largirentur; sciens quippe eam apostolicæ sedi reuerentiam a fidelibus exhiberi, vt quæ eius fuissent decreto disposita, nullius deinceps illicitæ vsurpationis molestia quaterentur. Vnde quia effectum & regia voluntas, & res valde desiderata poscebat, a prædecessore nostro Vigilio, Romanæ sedis antistite, ad prædecessorem vestrum Aurelium scripta transmissa sunt, vbi omnia, quæ amplectendæ voluntatis studium deposcebat, apostolicæ auctoritatis libenter an-nisu firmata sunt: quia difficultatem pati non potuit huiusmodi res petita. Sed vt fraternitas vestra quæ fuerint tempore illo decreta cognoscat, antedicti prædecessoris nostri

scripta his præuidimus scriptis adiungi. Quibus lectione percursis hortamur, vt omnia sacerdotali, sicut decet, studio inuiolata conferues, nihilque illi de indebitis, nihil permittas de illicitis irrogari, nec ea quadam patiaris vsurpatione conuelli. Nam licet ea, quæ semel apostolicæ sedis auctoritate sancita sunt, nil egeant firmitatis, ex abundantia tamen nostra, cuncta quæ pro huius rei quiete a prædecessore nostro statuta sunt, nostra iterum auctoritate in omnibus roboramus. Fraternalitas ergo vestra ita se in custodiendis eis exhibeat, quatenus & omnem occasionem inquietudinis excludat, & aliis hæc operari suadeat, dum se in custodienda defuncti piissima voluntate sollicitam, vt decet, exhibuerit & deuotam.

EPISTOLA CXVII.

GREGORII PAPÆ I.

AD DESIDERIVM EPISCOPVM GALLIÆ.

De pallio ipsius prædecessoribus concessio nihil in ecclesiæ Romanæ scriniis reperiri: mittat proinde, si quid in ecclesiæ suæ chartis inuenerit.

Gregorius Desiderio episcopo Galliarum.

FRATERNITATIS vestræ desiderium Ioannis regionali relatione cognouimus; quod quidem libenter parati sumus implere, si diligenter fuerimus de his quæ retulit informati. Inquit autem a vestra sibi relatum dilectione, quod ecclesiæ vestræ quædam olim priuilegia ab apostolica sede concessa sunt, atque vsus pallii eitis sacerdotes antiquitus habuisse. Quod quia vobis magnopere poscitis reformari, in ecclesiæ nostræ scrinio requiri fecimus, & inueniri nihil potuit. Sed quoniam quanto studiosius ista cupitis adipisci, tanto vos arbitramur esse sollicitos, in requirendis chartis ecclesiæ vestræ vigilantius curam impendite; & si qua exinde scripta inueniri potuerint, quæ nos valeant informare, huc curæ vestræ sit transmittere. Nam qui noua concedimus, vetera libentissime reparamus.